



# STINAPA TA INFORMA

## TANTE LINDA SU GRANITO

Voz di Boneiru ku Tante Linda! Ken no konosé e persona tras di e programa aki? 'Tante' Linda Coffie-Frans, apesar ku ántes e tabata tin su mannan yen ku kuater yu i awor ku sinku nietu, e ta deleitando nos muchanan boneriano ya pa 29 aña kaba ku su programa di radio. E rinkonero aki a risibí diferente kondekorashon i rekonosementu manera 'Lid in de Orde van Oranje Nassau' i 'Persona di Aña 1997'. Hopi hende no sa ku 'tante' Linda ta un guia di turista ofishal i tambe ku e ta un eskritor. E tin su stènt na marshe di Rincon fo'i 1999 bendiendo su artikulonan ku entre otro e turistanan. "Naturalesa ta engrandesé nos isla", e ta kuminsá splika ora puntr'é kiko naturalesa ta nifiká p'e. E ta sigui splika ku naturalesa ta ofresé trankilidat, ku hopi biaha ta un remedi pa salú di hende. Naturalesa ta un kreashon di nos Señor. E ta orguyoso ku e naturalesa boneriano ta asina impreshonante. Nos tin un airu fresku i puru pa disfrutá di dje. I tambe e paisahenan, kuebanan i barankanán úniko. "E playanan blanku ku ta konstantemente karisiá pa e olanan di laman Karibe", e ta sigui den un forma poétiko. Dunando oportunidat pa trabou bou i riba awa. Boneiru ta poseé un di parkenan bou di awa mas bunita di Karibe. Tin refnan di diferente formashon i piskánan kolorido. 'Tante' Linda ta sigui elaborá ku Boneiru tin un variedat grandi di paranan di tur koló. Especialmente esun ku a duna Boneiru tantu fama: e flamingo. 'Tante' Linda su lugá favorito ta na kunuku, kant'i laman. Dor di e palunan grandi, zonido di laman, serunan, kanto di paranan i gritu di bestianan e ta sinti un trankilidat. Especialmente e zonido di e bientu. 'Tante' Linda ta deskribi'é manera unu ku ta yora den e serunan tur dòrná ku yatu, bushi i kadushi. I anochi e ta disfrutá di e streanan na firmamentu. Tur e esenan aki ta dun'é bida i inspirashon. Naturalesa ta importante pa entrada di Boneiru ya ku e ta trese turista. Hopi biaha e turista ta haña na Boneiru lokual e no ta haña otro kaminda. 'Tante Linda' ke duna ku su programa di radio 'un granito' na edukashon, informashon i entretenimentu pa e muchanan. E mesun granito aki e ke a kompartí ku nos: "laga nos tur yuda tene Boneiru su naturalesa limpi i kuid'é!"  
*Skirbi pa Natalie Wanga.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**